

BEMBV S, SIVE DE ANIMORVM IM-
MORTALITATE.



Etrum Bembum, qui Leonis pont. Max. à secretis fuit, nemo est qui ambigat inter ætatis nostræ eruditos ferè omnes optimarum artium facile sibi pri-
mas vendicare, neque id mehercule iniuria. nanque admirabili quadam à te-
neris annis ingenij dexteritate bonarum literarum disciplinas ingressus, &
excellentissimis vsus præceptoribus, in magna electissimorum librorum co-
pia, neque sumptui neque laboribus parcens vllis, plurimum illis studij im-
pendit & temporis: vnde ad eum sanè literarum peruenit apicem, vt sine con-
trouersia cum doctissimus, tum omnis elegantiæ specimen & sit, & merito
ab omnibus esse censeatur. Verum diuinæ illius philosophiæ, quæ à Socrate
10 primum exorta, à Platone postmodum Academicisq; pertractata & illustrata fuit: quæ sæculi no-
stri ignavia haudquaquam cognita admodum spernitur, cum prius eruditorum ferè omnium ani-
mos sola teneret & componeret sola: illius inquam philosophiæ omnes ferè ad hanc usque diem vel
ignarum omnino illum, vel neglectorem constanter arbitrati sunt: idque ipsum, vt opinor, propter
ea accidisse crediderim, quia cum illum summa quadam animi affectione humanioribus literis dele-
ctari animaduerterent, & poëticis interdum studijs pangendisque carminibus vacare cognoscerent,
grauioribus eum ac planè seuerioribus philosophiæ præceptis adhibuisse operam non existimabant:
aut hominum fortasse vitio id suspicabantur, qui quod in se esse non sentiunt, aut etiam assequi se
posse diffidunt, nec habere alium quempiam, nec consequi posse contendunt. Verum longe aliter se-
res habet. Is namq; vir cum in cæteris philosophorum decretis, tum in Academicis præcipue tan-
tos habet progressus, ita in reconditos disciplinæ illius recessus sese penitus indidit, vt cum ex-
cellentibus eo in dogmate viris non modo ætatis nostræ, qui sanè sunt perpauci, sed prioris etiam
sæculi, tum cum excultior multo erat ætas, non immerito comparari certareque possit: adiunxit
præterea tot tantarumque rerum cognitioni admirabilem quandam eloquentiæ gratiam, vt siue
quid ex tempore proferre voluerit, siue scribendo literis mandauerit, ita illius fluat niteatque oratio,
is certe scriptioñis sequatur stylus, vt vnuſ nostra ætate, quod raro sanè prioribus etiam con-
tigit seculis, dicendi leporem cum rerum peritia copulasse merito videri possit. Quod cum ſæpe
aliás Romæ in publicis administrationibus, tum superioribus diebus priuatim apud nos manife-
ſtissime declarauit. Cum enim Patauij effet, quo ex diutino grauique morbo conualeſcens valetu-
dinis recuperandæ cauſa paulo ante concesſerat, & ad eum viſendum ſalutandumque nonnulli fe-
natorij ordinis viri primarij conueniſſent, inter quos Antonius Iustinianus & Ioannes Baduarius
vir ingenio doctrinaque præstantes erant, quorum alter Aristoteli Peripateticisq; mirifice erat
affectus, illorumque etiam placita aliquot annos Venetijs luculenter professus fuerat: alter vero
Platonem veterisque Academiæ assertores in primis admirabatur & extollebat: post prima illa, vt
valerent, ecquid noui effet, cæteraque huiusmodi quæ primis in congressibus fieri dicevaſſent,
cum iam factum effet silentium, & alterius ille sermonis ansam quaereret, ad Antonium conuer-
ſus & Ioannem, qui iuxta ſedebant: Quid vos, inquit, Antoni & Ioannes, quando philosophiæ
ambo egregiam nauatis operam, talibus ingenijs tantaque eruditione illam fecatis distrahitis
que, &, vt ſeditiosi ſolent ciues, in partes (quod aiunt) coniunctam illius & copulatam Rem
publicam dissipatis, neque vnam potius, vt eſt, eam eſſe permittitis! Audio enim vos ſæpenu-
mero vestris in congressibus multum diuque hac de re inuicem diſſidere & altercari ſolere, cum
vterque veſtrum tanquam pro aris & focis, pro hærefi obſuetetur & depugnet ſua. An igno-
ratis Peripateticos ipsos & Academicos ex eadem quaſi fontis cuiusdam origine defluxiſſe, no-
minibusque ſolum diſſerere illos, cum rebus ſententijsque inter ſe optime congruant, & vere con-
cordent? Tum Antonius, Dicuntur, inquit, iſta Bembe, dicuntur mehercule facilius quam ex-
pliſentur: & antiquorum nonnulli, vt audio, & recentiorum etiam aliquot id ipsum ostendere ſunt
conati: ſed meo quidem iudicio non minus ij quam illi (vt in prouerbio eſt) oleum & operā perdi-
runt. Nec immerito mehercule, quando hæ philosophorum ſectæ pugnantibus inter ſe nixæ decre-
tis, non in paucis quibusdam aut leuibus, ſed in omnibus ferè, & maximis præſertim de rebus tota-
(vt aiūt) diametro inter ſe diſtare & diſſidere videtur. Et quæ tandem ſunt iſta, inquit ille, in qui-
bus hæc pugnant dogmata, & conuenire non poſſunt? Et Antonius, An parua tibi, inquit (vt
hinc exordiar) non verborum ſed rerum potius videtur eſſe diſſenſio in ijs quæ ſtatiſ de pri-
mis rerum initij vtrique dicunt & ſentient? Nostri enim quatuor rerum omnium eſſe volue-
runt principes causas, materiam ſcilicet, formam, efficiens, & finem: illi autem his non contenti
alias inſuper adiungunt duas, instrumentalem nescio quam & exemplarem: recte ne an ſe-
cūs, haudquaquam labore. Non enim id indagare excutereque in præſentia contendo, ſed
quod diuersa loquantur & ſentiant (vt facio) id nunc oſtendere cogito. Mundum præterea no-
ſtri neque aliquando genitum, neque interitum vnuq; pro certo confirmant: illi vero

& à deo fabrefactum esse illum, & quantum in ipso est, corrumpi posse autem. Astra illi animo sensuque prædita, & singularia quædam esse animalia dicunt. Nos vero neque seorsum animata, neque sensibus insignita, sed cæli esse partes affihamus. Animos præterea generat Plato, & vt sibi videtur, ostendit illos esse perpetuos. Aristoteles vero neque ullum animorum recenset ortum, neque planè æternitatem declarat. Eosdem perenniter à se ipsis moueri contendit Plato: ab ijsdem vero omnem motionis abnegat modum Aristoteles. Longum profecto esset, & prolixo operis, in quibus ij discrepant viri, si recensere vellem omnia: de prouidentia: de fato: de dijs ipsis: de media dæmonum natura: de inferis. Quamobrem temporis angustiæ parcens, & breuitati studens, præsertim cum te audire potius quām ipse dicere & disertare cupiam, 10 pauca de multis, & hæc ipsa cursim quæ mihi ad manum venerunt, nunc in medium attuli. Ex quibus tamen vel cæco (vt aiunt) manifestum esse potest Academicos Peripateticos ne que verbis vñquam neque sententijs fuisse concordes. Tum ille subridens, vt sæpe solet, Quām accurate, inquit, & quām memoriter Antoni collegisti omnia quæ Peripatetici Academicique nostri (vtrosque enim æque complector) cum litigare quām conuenire malunt, hac de re in meedium afferre solent. Quamobrem tu mihi haudquaquam aliud agens in præsentia, sed bene mehercule præmeditatus, aut certe ab ijs disceptationibus satis recens huc planè accessisse viseris. Verum quanquam non tam dicendi mihi nunc, quām audiendi habenda esset ratio: adestis enim hic duo philosophiæ lumina: quia tamen nonnulla habere me credo quæ hoc in loco mediocriter adduci possent, quibus (nisi opinione fallor) verborum solummodo, non rerum, vt dixi, inter illos viros ostenditur esse dissensio, ea, si videtur, vt potero, breuiter recensebo: nisi forte vos aliud quippiam huic sermoni præuertendum putatis. Et quid aliud, inquit Ioannes, non solum nobis, sed bonarum etiam artium studiosis omnibus, quin potius vniuerso hominum generi, vel maius à dijs immortalibus, vel optabilius contingere vñquam posset, quām inueniri quempiam qui ceu honorarius arbiter recto iudicij examine inter Platonem Aristotelemque componere & posset & vellet? Verum prolixa admodum (vt arbitror) istiusmodi est res, plenaque controuersæ dissensionis, & longe verbotum ambages, pluresque essent, vt probe innotesceret causa, explicarique posset, compreenditiones faciendæ. Temporis autem breuitas nedum ad omnia quæ ad tantam pertinere controuersiam videntur explicanda non sufficit, sed neque ad ea quæ modo dixit Antonius, quæ quota illorum est portio enarranda, satis commode se habere videtur. Quamobrem non absurde meo quidem iudicio feceris si aliquam ex prædictis seorsum ceperis quæstionem, illamque, vt soles omnia, distincte luculenterque pertrahere contenderis. Vera narras, mi Ioannes, inquit ille, & ego iam pridem largus pollicitator cogitabam quonam me coniecisem imprudens, vnde non facile sanè ob temporis angustiam me expedire nunc possem. Verum quanam de re tu audire malis? De primis ne rerum initijs? An de mundi genitura, & astrorum naturis? an potius de animorum æternitate? Quicquid enim horum tibi sumpseris, vt id ordine explicari queat suo, integrum sibi nimirum exposcat diem. Quid enim aliud, inquit Ioannes, ex te audire nunc malim, quām de quo mihi cum Antonio nostro non conuenit, & pro quo plura sunt prælia decertata, & adhuc sub iudice lis est? Quid tandem istuc est? inquit ille. Animorum, inquit Ioannes, æternitatem nescio an credat Antonius. certe totis contendit viribus (quod etiam, cum loqueretur, animaduertere potueristi) non esse illam à Platone nostro sufficienter valideque demonstratam. Hac de re hodie, nisi quid aliud forte cogitas, differentem te audire percuperem, quando & Academica (vt audio) cum Peripateticis probe coniunxisti, & professioni alioquin hoc tuæ maxime consentaneum existat. Extinctis enim aliquo interitu animis, omnem funditus tolli religionem est necesse. Tum ille, Faciam, inquit, vt lubet, quando & sponte mea id sum pollicitus prius, & tibi nunc rem gratam facturum me esse percipio. Verum quid noster Antonius ait? Et Antonius, Præuertit me, inquit, hac in re Ioannes meus. id ipsum enim abs te, si tacuisset ille, expostulatus eram. Rem igitur mihi gratissimam feceris, si Platonicas de animorum immortalitate rationes docentis more vniuersas explicaueris, eas præsertim quæ scribuntur in Phædro, quæ mihi cum obscuræ alioquin & breues, tum haudquaquam (vt dixi) quod volunt ostendentes non immerito videri solent. Quasdam enim animis ascribunt motiones, quibus sublatis, vel non confessis, vniuersa animorum concidat æternitas necesse est. Tum ille, Demonstrant, inquit, Antoni, & mirifice sanè demonstrant animorum æternitatem rationes Platonicæ. quod autem breuiter & subobscurè fortasse id faciant, non eo inficias. res enim de qua agitur, multis obstructa est difficultatibus, & antiquorum (vt scis) fuit iste mos, res arduas & graues menti potius insinuare velle, quām auribus inculcare. Verum licet pluribus in commentarijs suis idem hoc facere animaduertatur Plato, de animorum enim immortalitate & in libris de Republi. loquitur, & in Timæo, & Phedone non minus differit, nonnullaque etiam hac de re in epistolis ab eo sunt conspersa: hoc tamen in loco quem à me tibi explicari nunc expertis, peculiariter ex ipsis essentia animi, & ex ijs quæ illi per se inesse censem, illius à Platone demonstratur æternitas: cuius ego inhærens vestigijs, quandoquidē hoc me subire oneris voluistis, & ego libens id ipsum recepi, hanc totā rem pro visu eo concludā modo, qui & facilior mihi, & ad nostrā disputādi vsum accōmodatior esse videbitur.

Verum meminisse vos velim , quando ad hoc de animorum æternitate Platonicum conuiuium neque inuitati (vt aiunt) neque oblati accessistis hospites , sed vltro vos ingessistis , si non ex dignitate vestra , si non opipare & laute , sed iciune & tenuiter accepti fueritis , vt non mihi succensere potius , quām vobismet imputare velitis . Ardua enim res est , plenaque immensæ subtilitatis de qua est agendum , & ad quam non illotis (vt aiunt) manibus proculdubio esset accedendum . Quamobrem feres me , inquit , & æquo etiam animo patiemini , si verbis interdum vti cogar nouis , nonnunquam etiam si externis , cum clarus quipiam nobis illa aut significantius quām nostra exprimere videbuntur . Non visitato enim admodum calle nostra progredietur oratio : & ideo omnibus vndique fulcienda adiuuandaque est adminiculis . Vt lubet , inquit Ioannes , modò rē ipsam intelligamus . Non enim iij sumus qui verborum splendorem & fucum potius quām res ipsas quærere curemus . perge 10 modo . Propositū igitur , inquit ille , nostrum , quando vobis ita videtur , deo cœptis fauente hoc agrediamur modo . Constitutum nobis est in præsentia Platonicis rationibus animorum immortalitatem ostendere , illorumque cum diuinam excellentemque , tum æternam & incorruptibilem declarare naturam . Istuc autem non incommode me facturum plane confido , si prius quidem quot sint corruptionis & interitus modi , in medium afferam , doceamque deinceps nullo illorum modo animos posse corrumphi . Si enim hoc ita continget , vt arbitror , animorum certe æternitatem omni ab ipsis sublato interitu proculdubio à me hodie demonstratum esse iudicabo . Ita ne vobis videtur , Antoni & Ioannes ? an aliter censem ? Nobis profecto , inquit Antonius , vt pro Joanne etiam responsa 20 deam meo , haud aliter videri potest . Quod enim corrumpi & interire nequit , id perpetuo manere & viuere necesse est : quam ob rem id ipsum monstrato modo . hoc enim opus , hic labor est . Tum ille , Probe , inquit , existimatis . quamobrem sic videamus . Quod corruptitur omne , bifariam sanè corrupti & interire percipitur . Aut enim ipsum à se ipso ob materiam in sese existentem corruptitur , aut extrinsecus ab alio quopiam interimitur . Verbi gratia , lignum aut sponte corruptitur sua solitarium iacens , putredine scilicet , teredinibusque consumptum . in se ipso enim sui gestat interitus causam , materiam videlicet , quemadmodum in suis de Republica commentarijs scribit Plato , asserens quæcunque sponte sua intereunt , omnia à domestico quodam & interno corrupti vitio . Aut rursum extrinsecus lignum corruptitur , vt cum ab igne comburitur , seu à dolabræ acie communitur , siue secatur à serra . Valens enim sui natura etiamnum perstare , externa interit iniuria . Quoniam 30 igitur (vt vidimus) duo sunt vniuersales corruptionis modi , geminæ iccirco à Platone nostro in Phædro de animorum immortalitate afferuntur rationes , duorum vi & potestate syllogismorum necessario collectæ , quarum altera quidem à semetipso animum destrui non posse demonstrat , quoniam se ipsum mouet animus , & ideo mouetur semper . Altera vero , quod neque ab alio perimi potest animus , clare ostendit , quando alijs omnibus ipse motionis cuiusque est initium & origo . Cæterum ad clariorem non minus dictorum , quām mox dicendorum intelligentiam , fortasse non erit malum syllogismos vtrosque cum suis seriatim recensere propositionibus , vt vniuersa isthæc explicata materia veluti sub oculis posita , nullo posthac negotio percipiatur . Prioris igitur rationis hæc plane est series . Animus à se ipso mouetur : quod à se ipso mouetur , semper mouetur : quod semper mouetur , est immortale : animus igitur immortalis est . Hæc , vt diximus , ratio nobis sanè ostendit à se ipso animum non posse corrupti . Secundæ autem processus ratiocinationis hoc maxime constat modo . Animus se ipsum mouet : quod se ipsum mouet , motionis est principium : quod est principium motionis , est ingenitum : quod est ingenitum , est incorruptibile : quod est incorruptibile , est immortale : animus igitur est immortalis . Hæc autem (vt dictum est) ratio peculiariter animorum immortalitatem ostendit , ideo quia à nullo extrinsecus alio destrui corruptive potest animus . Et hæ profecto duæ sunt illæ rationes quæ de animorum æternitate à Platone in Phædro sunt adductæ , quas tu Antoni cum breues admodum & concisas , tum difficiles & subobscuras tibi videri dixisti , quæ licet sint duæ , alia (vt diximus) atque alia animorum immortalitatem ostendentes via , quia tamen inter se aptæ quodammodo & bene connexæ sunt , vñica videri vtrinque sumpta potest ratio . Neque immerito mehercule . Quod enim à se ipso non destruitur , neque ab alio etiam quopiam destrui & corrupti potest . Nam cum in semet suæ causam gerat perennitatis & salutis , quoniam modo ab alio destrui & corrupti valeat , vix bene fingi potest , quandoquidem siibi semper adest , & saluum se esse vult . huiusmodi autem est (vt ostendetur postea) id quod à se ipso mouetur . Et rursum quod ab alio non corruptitur , sed principium est & causa potius vt alia conseruentur & viuant omnia , vt id à se ipso destrui corruptive possit , haudquaquam possibile esse videtur , quale motionis ostendetur esse principium , cum præsertim neque à superioribus illud corrupti causis verisimile sit , à quibus conseruatur & fouetur magis : neque ab ijs quæ infra sunt , cum ipsum essentiæ illis initium existat & causa , omnibusque sui præsentia motionem largiatur & vitam . Si autem à nullo corruptitur , quoniam modo rursum se ipsum corruptat & destruat , iugis omnibus fons existens & origo vitæ , reperire nedum difficile , sed impossibile esse videtur . Recurrunt igitur in sese rationes (vt diximus) istæ , quæ licet idem probare concludereque animaduertuntur ambae , peculiari tamen & propria quadam via vtraque id facere contendit . Sed nescio quomodo dum de complicatis connexisque rationibus istis loquimur , nostra labens sensim prætergressa est oratio , multaque fluxu rapuit & inuol-

uit suo, quæ alioquin non mediocri explicationis indigent cura. Inhibeamus igitur, si placet, paulisper, & unde egressi sumus, eò redeamus, vt ordine quæque suo & explicitur accuratius, & melius intelligi percipique possint. In superioribus (si recte animaduertitis) rationibus communis quædam duobus syllogismis sumpta est propositio, ista videlicet, Animus se ipsum mouet, siue à se ipso mouetur. Nihil enim refert, vt arbitror, utro dicitur modo, cum utroque propositionis diuersimode prolatæ eadem sit vis & potestas. Quod enim se ipsum mouet, à se ipso mouetur: & idem etiam rationis propositione transposita probe recurrit modus. Hanc igitur in primis propositionem pro virili explicare conemur: & de natura se ipsam mouente, quæ in ijs quæ mouentur, primaria sanè esse censemur, diligenter perquiramus, quam magni certe nominis viri, & in primis philosophus Aristoteles, infirmare & destruere sunt conati. Simul enim propositum recte agemus nostrum, & inter primarios philosophos Platonem & Aristotelem obiter etiam componere poterimus, qui mea quidem sententia (vt sæpe dictum est) & in alijs ferè omnibus quibus dissidere videntur, & in hac præcipue re de qua verbotenus litigant, sententia ipsa rectoque rationis intellectu bene conueniunt & concordant. Cum enim omnes corporeas ab animis motiones sciungat Aristoteles, & ictcirco neque semper moueri, sed neque moueri omnino illos afferat, haudquaquam merito apud eos qui hanc rem rite perpendere volunt, Platonem taxare potest, qui aliam esse animorum, aliam corporum afferit motionem: & proprijs peculiaribusque utraque hæc moueri affirmat motibus. In decimo enim de legibus commentario isthæc ad verbum memorie prodidit Plato. Trahit quidem animus cælestia omnia, & terrena insuper, & ea quæ in mari sunt, suis met motionibus, quarum ista sunt nomina: velle: considerare: curare: consulere: opinari, siue recte, seu perperam: gaudentem: confidentem: dolentem: timentem: amantem: perosum. Ex quibus vel cæco (vt aiunt) est manifestum alias motionis esse species quas animis assignat Plato, & alias quas ab eisdem Aristoteles remouet, & in verbis solum hac de re inter præceptorem & discipulum omnem esse controversiam. Quod enim Aristoteles animi affectiones, siue ægritudines seu passiones appellat, id motiones vocat Plato, cum uterque tamen corporeos motus ab animorum essentia censeat alienos. Neque hoc immerito equidem. quod enim diuisibili & continuæ conuenit endeletiæ, individualiæ animorum essentiæ qui conuenire potest? Verum hæc (vt dixi) pro talium concordia philosophorum à nobis obiter in præsentia sint adducta. quamobrem ad nostrum redeamus propositum, probemusq; pro virili aliquod motionis initium in rebus necessario reperiiri, idque ipsum naturam esse quæ se ipsum mouet. Hoc autem præcipue aggrediamur modo. Cum planè constet, perspicuumque sit, esse in natura aliquid quod ab alio manifeste moueatur, quærendum sane est utrumne id quod mouet, moueat & ipsum ab alio motum, & illud rursum ab alio etiam motum moueat, & sic ad infinitum: aut circulo illa quæ mouentur ab alio, se inuicem mouent, & à se mouentur, ita quoddam primum semper moueatur ab ultimo: aut est tandem ad primum venire quiddam, quod se ipsum mouens, & alia, à nullo extrinsecus alio moueatur. Neque alias quisquam à supradictis eorum quæ mouentur, omnino reperiiri potest modus. Cæterum cum duo illi priores motorum modi ratione penitus careant, quoniam neque infinitas, vt ita dicatur, in essentijs reperitur vlla, infinitorumque ratio sub scientia cadere nulla potest: & circularis ille à se inuicem cum mouentium, tum motorum contextus vniuersi ordinem destruit, cum idem eiusdem causam faciat & causatum: vt merito ex plodantur illa, ad quoddam sanè motionis peruenire principium necesse est, quod iugi perennique vita actu cuncta post se mouet & temperat: quod esse animum & Plato proculdubio, & Aristoteles voluerunt, licet is immobilem illum esse afferat, Plato autem naturam se ipsum mouentem, eo quo diximus modo, constanter asseueret. Cæterum si commutentur nomina, & se ipsum mouentis loco se ipsum perficiens reponatur, aut se ipso viuens, & in se ipsum agens & patiens, omnia profecto Aristoteli & Platoni quām optime quadrare videbuntur. Intellectus squidem, quem animi supremum ambo esse volunt caput, & se ipsum intelligit, quando eius essentia illius est actio, & se ipsum perficit: & licet impropriæ, per transumptionem tamen in se ipsum & agere & pati non inconcinnus dicitur: sed quoniam paulo post hac ipsa de re suo dicetur loco, ictcirco reprimam me nunc, & non prosequar longius. Constitutum igitur cum sit in præsentia, & de philosophorum consensu utrumque sanè compertum & declaratum, motionum omnium principium & fontem esse animum, quoddam se ipsum moueat, & à se ipso moueatur, hoc deinceps videamus modo. In vniuersa entium omnium latitudine à contrario in contrarium nusquam nisi per medium commeat pertransitque natura. hoc enim modo à calore in frigus intercedente permeat tempore, & ab albo in nigrum fusco interueniente transmittit: ab oppositisque semper qualitatibus ad oppositas per illarum graditum media: quod in anni etiam temporibus est videre. ab æstate enim ad hyemem, & ab hyeme rursus ad æstatis tempora natura, hic interiecto vere, illic autumno progreditur medio. & ad summam tum in corporibus ipsis, tum in natura etiam incorporea omnes à contrario in contrarium transitus peculiaribus proculdubio fieri medijs animaduertuntur. Simili igitur rationis modo in proposito etiam fieri nostro est necesse. Cum enim in entium reperiatur genere id quod ab alio solum est motum, & rursum id quod penitus est immobile, interstitio sanè respondi in medio necesse est id quod tum mouet, tum mouetur, quod à se ipso moueri dicimus, vnum inquam & idem numero existens & subiecto, mouens & motum, vt obi-

ter Aristotelem & Peripateticos caueamus , qui animal huiusmodi esse per se , & à se motum autumant . Non enim idem numero & subiecto in ipso animali mouetur & mouet quippiam , sed anima quidem solum mouet (vt illis sanè placet) corpus vero mouetur solummodo . Non igitur se ipsum mouere proprie dicetur animal , cum isthac ipsa proprietas in simplici solitariaque natura , quod retro diximus in eodem numero & subiecto , reperiiri debeat , quæ media , vt vis dimus , reperta est inter immobilem penitus naturam , & illam quæ solum mouetur ab alio . Et alioquin cum ipsum animal , vt Aristoteli ascribunt , ex immobili quadam natura , anima scilicet , & ab alio mobili , corpore videlicet , plane sit compositum & conflatum , non potest id quod in præsentia quærimus , esse , se ipsum scilicet mouens & agitans , cum neque anima secundum illum penitus moueatur , neque corpus quippiam moueat : se ipsum autem mouens , vt græcum bene indicat nomen , ἀυτοκίνητος , idem numero & subiecto existens , tum mouet se , tum à semet mouetur . Quanuis (vt sæpe dictum est) si recto iudicij examine rem hanc bene perpendere vellemus , naturam profecto se ipsam mouentem de Aristotelis sententia ipsum esse animum non iniuria contendere possemus . Scribit enim is vir in physicis suis his fere verbis . Quod si opus fuerit determinare vtrumnam sit motionis initium & causa , se ipsum mouens videlicet , an id quod ab alio mouetur , illud profecto sine controversia omnes dabunt : principium autem motionis omnium animum esse , apud philosophum Aristotelem clarius est , quam ut aliquo ostensionis egeat adminiculo . Præterea cum animatum omne ab inanimi ipsa sit distinatum distinctumque vita : viuere autem nihil aliud sit , quam intrinsecus ab anima per illius altricem agitari potestatem , quam in suis de anima commentarijs , motionem tum ad nutrimentum , tum ad augmenta & decrementa philosophus vocat Aristoteles , cur non de illius etiam sententia à se ipso mobilis , id est ἀυτοκίνητος iure dicetur animus , qui sua se sponte excitat , & corpus ita agitat & impellit ? Verum hæc in præsentia obiter sint transcursa . Cæterum quoniam complures hac de re hucusque & variæ in medium sunt adductæ rationes , nonnullaque etiam interiecta , quæ etsi ad propositum faciunt negotium , interpellata tamen dicendi serie , obscuriorum fortasse quam desideramus orationem effecerunt nostram , si volentibus vobis facere me crederem , breuiter quæ dicta sunt colligerem omnia , vt & vniuersa de qua agitur res mea illius innotesceret , & sub uno statim contuitu apte teneretur . Sub hæc dicta cum reticuisse ille , ceu quid sibi mandaretur expectans , Antoniusque & Ioannes istuc summe se cupere dixissent , rursus hoc exorsus est modo . Initium esse quoddam , Antoni & Ioannes , originemque motionum omnium (vt animaduertistis) necessaria diuisione collegimus : idque ipsum esse animum Platonis Aristotelisque consensu planè dijudicauimus . Porro eum in interstitio collocatum medio perspeximus naturæ penitus immobilis , & illius quæ solum mouetur ab alio : quamobrem non immerito diximus motionum omnium animum esse principium : & qui se ipsum moueret , & à semet moueretur : quod græci vno exprimentes vocabulo apte & significanter ἀυτοκίνητος appellant : vnde etiam ad quotidianum loquendi usum res ista peruenisse videtur . Animatum enim omne id appellat vulgus , quod à se ipso moueri , id est intrinsecus agitari percipiunt , ceu animæ sit ista vis & potestas , se ipsam prius , & corpus deinceps mouendi . Quemadmodum enim in entium quæ intelligunt ordine quiddam est quod ab alio intelligendi accipit munus , veluti de Aristotelis sententia mens illa est quam potestate intellectum vocat ille , aliud autem à se ipso intellectionem habet , quam impertit alteri , ipsum autem cum omnimodæ sit fons & origo intellectionis , & alia sanè omnia & se ipsum non minus intelligit , vt illa est mens quam actu intellectum Peripatetici appellant : ita in ijs quæ mouentur , hæc quidem ab alijs solum agitari mouericq; percipiuntur , vt corpora sunt omnia : illa vero & alijs motum præstant omnibus , & se ipsa mouere nata sunt , quales esse animos retro (vt arbitror) manifeste satis est demonstratum . Hæc igitur diuina animorum est natura , iugi se ipsam motione semper agitans , quam in suis de legibus commentarijs diuinus ille Plato primum omnium motionum initium , & vnicam esse causam præclare demonstrat . Nam & efficiens motionis est causa , & exemplaris , & finalis , quæ propriæ veræque entium sunt causæ . Formalis enim siue specifica cum in producta factaque reperiatur re , imò res ipsa sit iam effecta , causatum potius quam causa merito existimari potest . Materia autem longius etiam à vera causa distat ratione , cum in earum reponatur numero causarum , quæ à philosophantibus , si ne quibus non , appellari consueuerunt . Quamobrem in iisdem de legibus commentarijs diuinus Plato omnium esse causam motionum naturam se ipsam mouentem alia etiam ostendere volens via , Si omnia , inquit , quæ mouentur , starent , quidnam esset id quod primo moueretur ? An illud sanè quod sua sponte & à se ipso mouetur ? Neque hoc ab re . Si enim id quod motrici prope fit causæ , manifestò moueri videmus , omnibus quæ alieno mouentur impulsi , quiescentibus , profecto hæc ipsa se mouens natura , cum in se motricem gerat potestatem , illique non solum fiat propior , sed vniatur etiam & copuletur , quinimo omnem effectivæ suæ inde capiat rationem ; & prima mouebitur vtique , & alia motu suo mouebit omnia . Ambigimus autem nos hac de re , & non facilè rationi obtemperamus , quia corporeis emâcipati sensibus , & illorum iudicantes arbitrio , mentis obtusos & hebetes oculos habemus . Quemadmo-

DE ANIMORVM IMMORTALITATE.

dum enim si quispiam aut loci vitio, sicut de Cimmeriorum dicitur populis: aut casu etiam aliquo solis nunquam conspexisset iubar, diei tamen cerneret claritatem, is merito mehercule dubitaret disquireretque quænam tam immensi splendoris existeret causa: ita quia animum ipsum non cernit vulgus, & ab oculorum consuetudine difficulter se abdicat, motionis illum esse principium, & à seipso moueri non immerito ambigere animaduertitur. Qui tamen cum alia moueat omnia, multo prius se ipsum mouere verisimile est, haud dissimili mehercule commemorati solis exemplo, qui alia illustrans omnia, multo prius se ipsum splendidissimo vegetat & replet lumine. Vnumquodque enim (vt recte physici dicunt) perfecta actionum suarum semper orditur initia. Verumenimvero cum sit constitutum, & satis (vt arbitror) ex dictis ostensum, motionum omnium initium esse animum, & quod is se ipsum sponte mouet sua, & à se ipso mouetur, facilior profecto post hoc & longe clarior Platonicæ deductio rationis existet, per quam illius demonstratur æternitas. Quod enim à se ipso mouetur, cum semper sibi adsit, & nusquam se deserat, absit statq; nusquam, semper moueri necesse est. Si enim quæ mouentur ab alio, eousque moueri animaduertuntur, quoadusque motori adhærent & appropinquant suo, quid illi consentaneum est accidere naturæ, quæ non tantum coniunctam, sed unitam etiam & consubstantialem (vt ita dicam) sibi habet motricem vim? Nihil aliud profecto, nisi perenniter illam & semper agitari & moueri. Animi enim motio finem ideo nunquam est habitura, quia nunquam se ipse deserturus est animus. quod autem finem non habet, semper est. agitetur igitur animus semper necesse est. Ex quo deinceps illius certissima ratione colligitur æternitas. Animi nanque motus illius est vita, cum in ipso principium & origo omnis reperiatur vitae. Cæterum hoc in loco obiter vos admonitos voluerim, hanc philosophi rationem non ex probabilitibus quæ fidem solum faciant, procedere rationibus, sed certissimæ necessitatem in se demonstrationis habere. Ex primis enim & per se, & in se inuicem recurrentibus, quæ conuertibilia iuniores vocant philosophi, manifestissime deducitur, ex quibus omnis sanè conflatur scientiæ modus. Quod enim principium est motus, se ipsum mouet, & semper mouet: & quod se ipsum mouet, tum semper mouet, tum motionis est principium vniuersæ. Et rursum quod incessanter mouet, & se ipsum mouet, & omnibus alijs prima motionis præstat initia. Sed alia etiam via istuc ipsum ostendi demonstrative hoc maxime potest modo: id quod præstare vallet excellentius quippiam aliquo in genere & dignius, idem profecto eodem in genere inferius vi- liusque aliquid facile præstare poterit. excellentius autem sine controversia est & dignius, bene esse, quæm ipsum simplex esse. id autem sibi ipsi præstat animus, quando se excolit & perficit, & à corporis se contagio seuocat & abducit. Præstabit igitur sibi & ipsum esse. animi autem esse, illius est vita. Vita vero nihil aliud esse censetur nisi perennis quædam iugisque motio. sibi ipsi igitur motum præstabit, & à se ipso mouebitur animus. Quamobrem hoc etiam modo ex incessanti illius motu, animi apparebit æternitas. Nec immerito mehercule. diuina enim omnia, & quæ aliquid primo alijs præstare impertirique videntur, à semet incipere & exordiri necesse est: quod vel claro diurni syderis exemplo nobis clarere potest. sol nanque cuncta lumine collustrans suo, ipsum certe est lumen, splendorisque fons & origo vniuersi. Quamobrem cum cæteris omnibus vitam & motum præstet animus (illius enim gratia Aristoteles ἀυτοκίνητος, id est à se ipso motum appellat animal) multo profecto magis & prius sibi ipsi & vitam præstare & motionem necesse est. Semper igitur mouetur animus, & deficit nunquam. Quæcumque autem externo agitantur impulsu, cum in se ipsis motricem illam nō habeant vim, aliquando motū ab alio recipientia: quandoque etiam illum amittere est necesse. Cessante autem illo, cessat vita, inquit Plato. motum enim animi, illius (vt diximus) intelligi vult vitam. Cæterū hoc in loco de cæli corpore non contemnenda sanè oritur difficultas. Si enim quoniam semper mouetur, à semet illud moueri concesserimus: non solum animo, sed corpori etiam principium & originem dabimus motionis: quod fieri haudquaquam potest, vt vnius scilicet rei duo prima reperiantur exordia. Si autē ἀτεροκίνητος, id est alterius impulsu agitatū illud esse dixerimus, de Platonis sententia aliquando à motu esse cessaturum illud, & interitum quandoque concedere cogemur: quod, exceptis paucis, philosophantium concedit nemo. Vtrinque igitur (vt percipitis) nos vrgent angustiæ, & in salebris (vt aiunt) nostra versatur oratio. quamobrem complananda mihi veritatis est via, hocque pro virili in primis est explicandum, simulque Platonis dicto in præsentia moderandum. Hoc autē maxime aggrediamur modo. id quod à se mouetur, quod ἀυτοκίνητος græci vocant (nihil enim prohibet, vt opinor, breuitatis perspicuitatisque causa istuc sæpius usurpare vocabulum) in duplice percipitur esse differentia. Aut enim simplex est, nulli obnoxium divisioni, & omni prouersus carens parte: & huiusmodi proprie& est, & dicitur ἀυτοκίνητος: qualis est animus. aut est interuersus quibusdam, quas dimensiones vocant, iam distinctum, & corpoream habens mole, quod, licet improprie, ἀυτοκίνητos & ipsum appellatur, cuiusmodi esse cælum animaduertitur: quod quia corpus est, & ideo à motionis totius fonte distat animo, ἀτεροκίνητos merito dici potest. Quoniam autem in corporum genere primum est, materiaque caret transmutabili, & connatam in essentia sua gerit vitam, à qua deseritur nunquam, vnde etiam perpetuo mouetur, siccirco ad illius similitudinem quod proprie tale est, ἀυτοκίνητos non ab re appellari potest. Est igitur cælum media quædam inter id quod vere à se mouetur, & id quod proprie mouetur ab alio, collocata constitutaq; natura, vtriusq; particeps rei: & vtroruncq; licet improprie, sortita tamen, vt dictum est, nomen. neq;

enim ἀυτοκίνητος per se, neq; ἴτεροκίνητος propriæ cæli est corpus, cum & moueatur ab animo, & incessabili semper motione versetur. Cæterum haudquam immerito hoc illi contingere videtur. semper enim secundarum summitates & apices rerum, ut vniuersi seruetur continuitas, omniaq; conuenientibus repleantur medijs, & primorum copulantur extremis, & illorum nonnihil sapere naturæ prohibentur. Cum igitur primum in corporum genere sit cælum, ultimum autem intelligibilis naturæ sit animus, complicari copulariç isthæc, & similitudinem conuenientiamq; ad se inuicem habere quandam necesse est: quamobrem ætherium corpus si veluti anima quædam & vita extensa quodammodo, & in molem disperita à se moueri, & indefinenter perpetuoq; agitari dicatur, non perpetram profecto falsoq; dicetur. Connatam enim (vt diximus) & ceu commixtam in essentia sua gerit vitam, à qua cum deseratur nusquam, perpetua iccirco motione versatur. Cæterum alia hoc in loco ex ijs quæ dicta sunt oritur difficultas. Sunt enim qui nobis dant, & id quidem libenter, à se ipso moueri semperq; agitari animum: addunt tamen id illi contingere donec fuerit, verum nihil prohibere eum quandoque extingui & interire. Quos non ab re percontandos in præsentia ducimus, vtrumne cum interit (vt volunt) animus, illius ante cessat actio, quam ἀυτοκίνησις græci, nos iugem sui ipsius motionem dicimus, postmodum vero ipsius deficit essentia: aut è contrario prius ipsa definit essentia, postea vero perennis illa interit motio: an simul essentia deficit & motio. præter enim treis istos alius profecto inueniri non potest modus. Cæterum cum neque essentia ante actum possit desinere: ab illa nanque omnis fluit operatio & motus: parique modo neque actus ipse ante essentiam destrui corrumpique possit, constitutum enim concessumque ab illis est, donec perstat animus, perstet illum à semetipso moueri: tertium necessario concedendū est, in animi scilicet interitu ambo simul desinere, essentiam videlicet, & actionem: aut, quod idem valet, esse ipsius, & eius motionē. Rursum igitur hoc ita constituto, absentes aduersarios ac si adessent isto interrogemus modo. Quandoquidem vultis ô viri, imò concedere nunc coacti estis animum interire, quia simul (vt dictauit ratio) & essentia deficit & motio, à quonam huiusmodi accidere illi dicemus interitum. Profecto aut à se destruatur animus, aut ab alio extrinsecus interimatur necesse est: quod in superioribus clarissimo ligni docuimus exemplo: neque sane est dare tertium illius interitus modum. Cæterum tantum abest vt seipsum interimat corruptaque animus, vt se perenni illo, & vt ita dicam, essentiali saluet potius & custodiat motu, vitamque iugiter foueat suam. Simplex præterea animi est natura, neque habet in se quicquam admixtum quod dispar sit sui atque dissimile. Quamobrem neque diuidi usquam neque interire potest: quod quia naturæ secus accidit corporeæ, iccirco à se ipsa fatiscere illam aliquid & dissipari necesse est. Sed neque extrinsecus ab alio quopiam interimet animus, alioquin non ἀυτοκίνητος esset ille, sed ἴτεροκίνητος, cum externa iugruente vi ad interitum compellatur, contra id quod positum à vobis concessumq; retro fuerat, animum scilicet dum animus est, & à se ipso moueri, & incessanter moueri. Præterea si ab alio destruitur animus, aut à superioribus longeq; se dignioribus destruetur causis: aut ab infra se positis, ignobilioribusve. Atqui superiores omnes super animum collocatæ stantesq; causæ illum perficiunt potius, & saluum volunt. Diuina enim huiusmodi sane sunt omnia, haudquam inuida, & bonorum suorum large munifica, redundantiq; salutaria bonitate. Inferiores verò hoc efficere nequeunt causæ: cum illi obsequantur & pareant magis, & ab illo ceu à perenni quodam fontis exordio suarum auspicentur initia motionum. Non igitur à semetipso, sed neque ab alio quopiam (vt ostensum est) destrui potest animus: quamobrem immortalis illum proculdubio & incorruptibilem semper manere necesse est. Est & alia subtilis mehercule & de naturæ penetralibus eruta ratio id ipsum hoc efficiens & cogens modo. Cum enim corruptio totius & omnis interitus (quemadmodum in physicis philosophus docet Aristoteles) priuatione existat causa, id certe quod istuc non admittit incommodum, nulli unquam patere corruptioni necesse est. porro neque forma ipsa, quam & speciem vocant, neque quod suapte natura formæ est particeps, priuationem in se recipere ullam animaduertuntur: illa quidem merito, quoniam nihil suum admittit recipique contrarium: formæ autem contraria est priuatione. Hoc vero ideo, quia dum est, connatam semper habet suæ formæ præsentiam. quamobrem contrariam recipere priuationem haudquam potest. Ignis enim quia congenitam habet caliditatem, iccirco frigiditatem admittere nullam potest. Cum autem animus quædam sit forma & species priuatione semper carens, omni prorsus carebit interitum. Neque hoc ab re mehercule, quod enim corruptitur, omne ideo corrupti & interire censetur, quia naturam in se habet quandam quæ aduentitias & externas (vt ita dicam) formarum admittit impressiones: & iccirco contraria fadile recipit omnia: quinimmo ceu id ipsum habeat muneris, in ijs alternare per vices variarique nata est: qua quoniam caret animus, ideo omni prorsus carere interitum est necesse. Habet autem substantia illa, quam compositam physici vocant essentiam, ab ea de qua loquimur natura, quam ὑλὴ græci, nos recto materiam appellamus vocabulo, indefinitum quicquid habet omne, & inconstans, & lubricum. Continuæ nanque mutationi & corruptioni materiale obnoxium est omne, nunquam eodem consistens gradu, sed semper Protei modo labens & præterfluens, & fiens verius quam factum, & quod generari potius dicatur, quam vere existere. Siquidem momentaneum solummodo habet esse, cum vtrinque non esse liquido habere percipiatur: ante quidem, quia generabile est: retro autem, quia est corruptibile. Ab huiusmodi igitur materiæ natura composita tot incommoda pa-

10

20

30

40

50

60

titur essentia: à forma autem, siue specie, & ipsum habet esse, & determinatam essendi possidet rationem: & omnino quod perfectum quiddam in entium est genere, & quod existit, huiusmodi quale esse percipitur, omniaq; illi merito refert accepta. Ex quibus omnibus clare (vt arbitor) animorum patet aeternitas: & rationis explanatio prioris Platonici syllogismi etiam est manifesta, quo in superioribus dixeramus animi immortalitatem ea scilicet ostendi via, quoniam à semetipso destrui corruptique non potest animus. Secunda autem ratio per quam eadem animorum, licet modo alio, ostenditur immortalitas, vnicam in se anticipem recipit propositionem, eam scilicet quę dicit motionis ingenitum esse principium. namq; alię tum communes sunt, & in superiori explicatae ratione: tum autem non solum à Platone, sed ab Aristotele etiā & Peripateticis comprobatae: quā obrem dimissis illis hāc ipsam de qua ambigere quispiam posset, diligenter in præsentia excutiamus. Sunt enim qui dicant ingenitū esse, non omni conuenire principio. Nam nihil prohibere quippiam alicius esse principium, non tamen id esse ingenitum: & exemplo etiam se iuant. Ecce, inquit, Aecidarum principiū est Aeacus, & tamen is generatione non caret. Ad infirmandam autem destruendamq; propositionis cōunitam, vnicam aiunt sufficere adductam instantiam. His igitur occurrentes dicimus principium quantum ad propositam spectat rem, illud certe esse quod primo vniuersam illius cuius dicitur esse principiū, producit speciē: verbi causa ipse homo, quod ἀντανθρωπος Græci, nos hominis idea, siue species seu exemplar dicimus, omnes vbiique potestate sua producit homines. Similique modo ipsum æquale omnes in omni genere efficit æqualitates, & ἀυτοκινητοι omnes motionū omnium producit rationes. Huiusmodi autem ingenita esse principia est necesse, eo scilicet modo quo animaduertuntur esse principia. Nihil enim prohibet eadem vt intelligibilia sunt verbi causa, aut intelligentia, aut entia, ab alijs sanè prouenire principijs: verum eo rationis modo principia non existunt, sed ab alijs defluunt emanatq; principijs. Principium igitur omne, vt est huiusmodi, ingenitum proculdubio esse necesse est. Non enim fit principium eorum quippiam quorum principium dicitur: verbi gratia intellectus principium intellectionis existens, non aliud, sed à semetipso intellectionem habere censetur. Ens ipsum aliorum omnium essendi causa & origo, non ab alio, sed à se ipso essentiam possidet: ipse sol vniuersi fons & principium luminis, nusquam id accipit quod omnibus impertit imbar. Verum cur ego hac in re tam diu & vobis fortasse negotium præbeo, & ipse inuicem mihi facesto, quæ vnicō facillime verbo concludi potest? Principium motionis ingenitum esse contendimus, nec immērito id quidem. nam si genitum esse confirmetur, cum generatio omnis aut motus sit, aut nō sine motu, ante omnem motionem dicere sanè cogemur esse motum. quod cum per se sit absurdum, & manifestam in se contineat repugnantiam: tum etiam absurdius fieri videtur quando ad infinitum nobis hac in re progressionis aperit modum, in nullo cogitationis termino firmante se animo, sed motum semper ante motum indesinenter sibi affingēte, & nusquam stante. Concedendum igitur est (vt arbitor) principium omne vt est huiusmodi, esse ingenitum. quare motionis etiam principium esse ingenitum fatendum est. Cæterum quoniam in Platonica secundæ rationis ostensione plures etiam partialium rationum latitant modi, acculta probantes vi principium omne ingenitum esse: age quādoquidem hanc cœpimus nauare operam, & vobis non aliud videtur agendum, illos etiam breuiter & cursim (vt aiunt) explicemus. Principium omne primo est id quod esse dicitur, verbi gratia principium luminis primo luminosum esse censetur. Caloris principium primo calidum & est, & esse dicitur. Simiter alia principia omnia hoc se habere modo fatendum est. Nullum genitum primo tale est, cum omne genitum ab alio sit generatum, & ab alio procedat simili. Nullum igitur principium est genitum: ingenitū igitur. Præterea cum omne genitum ex alio generetur sui ortus principio: si genitum detur esse principiū, ex principio utiq; aliquo erit genitum. quamobrē principiū (vt retro visum est) erit principium, & ad infinitum principiorum extēdetur progressio. Adhuc etiā, omne genitum ex aliquo non huiusmodi constitui generariq; percipitur. homo namq; ex non homine, animal ex non animali generatur: & in ijs etiam quæ arte fiunt, similis illorum fabricæ deprehenditur esse ratio. Lectulus enim fit ex non lectulo, & domus ex non domo fabricatur. Quamobrem si vñquam generatur principium, ex non principio utiq; fieret: & rursum cū omne (vt diximus) genitū ex principio generetur, ex principio fieret principiū. Ex non principio igitur, & rursum ex principio generabitur principiū, si generationē aliquā illi assignare voluerimus. quo nihil certe absurdius, aut pugnās magis dici aut cōminisci potest. Satis igitur (vt arbitor) ex dictis ostensum est ingenitū esse principiū. Ingenitum autem omne incorruptibile est. quicquid autem corrupti non potest, aeternum est. quod est aeternum, neq; morti obnoxium est, neq; aliquo interit modo. Animorū igitur essentia incorruptibilis est & immortalis, iugi se ipsam vegetans motu, & omnes insuper motionum species, id est vitæ modos, ex secessanter producens & proferens. Cæterum quoniam semoto à principiū natura generationis exordio, corruptionis etiam verisimiliter semouendus est finis: hoc certe in loco vniuersa de animorum immortalitate sufficienter commodeq; conclusa videri poterat ratio, cum & alioquin omnes hac in re omnium consentiant philosophorum sectæ, & Aristoteles euidenter in suis de celo commentarijs ingenitum omne incorruptibile etiam esse demonstret. quamobrem si recte measistis, in ijs quæ retro diximus, hac de re me non esse verba facturum non immerito præ me tuli. Quia tamen diuinus Plato, siue admirabili quadam ingenij copia & vertate nihil intactum hac in te, nihil non excussum dimittit, siue id potius de composito hominum causa facit, vt omnibus illi

numeris diuinam in se agnoscant & venerentur partem: & siccirco non solum ingenitum, sed incorru-
 ptibile etiam probat esse principium: age & nos illius rationem, quae non ex directo (vt aiunt) propo-
 situm, sed per impossibile sequens ad oppositum, concludit datum, breuiter hoc explicemus modo.
 Si principium (vt dictat ratio) incorruptibile non est, corruptibile utiq; erit. Supponatur igitur corru-
 ptum esse principium. Corrupto certe principio neque ipsum ab alio quoipiam poterit restitui
 & effici: neq; aliud quippiam ab illo fieri producere poterit. Quoniam enim omne quod generatur, ex
 aliquo generari principio necesse est, interempto certe destructoque illo, nihil profecto poterit aliud
 generari. Et rursum neq; ipsum ab alio quoipiam fieri producere poterit, quoniam omne quod fit, ex
 quodam fieri principio concessum est. Positum autem fuit principium esse corruptum. Quamobrem
 ceu rerum omnium præcisa enectaq; radice, nihil inde emergere pullulareq; amplius poterit. Incorru-
 ptibile igitur est principium, vel omne (vt inquit Plato) decidat cœlū necesse est, generatioq; intereat
 & cesset vniuersa, motionis interempto principio primo. Quod cum animi esse naturam in superio-
 ribus clare sit ostensum, animum incorruptibilem esse & immortalem summa est necessitas, cuius,
 vt probatum est, neq; à se vsquam, neq; ab alio quoipiam destrui corrumpiq; potest essentia. Verum
 hoc quoipiam in loco ob ea quae retro dicta sunt, de elementorum naturis non immerito posset ambi-
 gere. Cum enim inanima elementa sint omnia, & vniuersa in hoc philosophorum omnium cōsentiat
 natio, ad peculiaria tamen quæq; ferri loca, & interno agitari principio animaduertuntur. Ignis enim
 naturæ permisus suæ, summa petit statim. Terræ autem gleba non prohibita rectâ defertur ad ima.
 Animantis quinetiam extinti corpus sponte sua ad corruptionem moueri percipitur. Quamobrem
 aut non omnium esse motionum principium animum concedere planè cogemur, si illa inanima, vt
 sunt, fatebimur esse corpora: aut si dixerimus animata, ad inconuenientius profecto quiddam & ab-
 surdus merito deuoluemur, in putrescente animalis cadavere largitorem vitæ & essentiæ animum
 collocantes, destructionisq; & interitus causam illum esse asseuerantes. Ad has igitur & ad istiusmodi
 alias verborum potius q; rerū obiectiones vñica & eadem facili occurrentes via, omnium principium
 motionum esse affirmamus animum, idq; omni asseueratione contendimus, qui iugi perpetuaque sui
 agitatione & omnia motionum ex sese producit genera, & rebus insuper omnibus esse largitur & vi-
 tam. Nam & elementa ipsa de quibus præsens ambigit ratio, quae inanima esse peculiari partialique
 vere existimantur anima, ab ipso certe vniuersi animo nihilominus fouentur & animantur omnia,
 ab eodemq; illorum intercedente natura, ad propria quæq; moueri loca certum est. Naturam enim
 & in his ipsis, & in alijs etiam omnibus, animi vestigium quoddam & exemplum esse proculdubio
 elegatiōes omnes voluere philosophi: pariq; rationis modo extinti animantis corpus, cum vniuersi
 quædam sit portio, animo præditum quodammodo esse fatendum est. Quemadmodum enim in nos-
 bis quæcunq; sunt omnia, excrements etiam & sordes dum insunt, vitali quodā participare contine-
 riq; calido animaduertuntur: ita quæcūq; circumiectu suo capax complectitur mundus, omnia illius
 complecti contineriq; animo, vero consentaneū est. Mouetur igitur ab vniuersi animo animantis ex-
 tintum corpus, non ad corruptionem sanè & interitum, (dudum enim id interit animal) sed ad
 esse aliud, & ad aliam vniuersitatis transfertur indigentiam. Ad commodum enim decensq; vniuersi
 motus omnes suos mundanus temperat animus. Quod etiam in corporibus nostris partialē
 naturam animaduerte licet, cum pro indigentia sui hos quidem in nobis dissipat & consumit hu-
 mores, alios vero corrigit & emendat, nonnullos autem ceu rebelles & noxios procul à se abdicat &
 expellit. Et hæc de animorum immortalitate, & Platonicis hac super re adductis rationibus, quae mihi
 in promptu fuerunt, & pro tempore sese mihi obtulerunt, in medium libens mehercle attuli, vt
 & vtrorumq; vestrum, quos plurimi sanè facio, morem gererem voluntati. Voluistis enim me quid de
 ijs sentirem ostendere, & vt mihi etiam ipsi non minus satifacerem si diuinā hominis partem merita
 præconiorum laude pro virili concelebrarem. Laus enim animi meo quidem iudicio est vel immensa,
 & omnes verborum omnium celebritates exuperans, illius explicata ostensaque natura qua homi-
 num genus peculiari quodam domesticoque cognitionis vinculo proxime ad deos ipsos accedere sa-
 nè existimatur. Nec me præterit multas etiam alias hac ipsa de re cum antiquorum tum recentium
 philosophorum idem ostendentium in præsertia adduci posse rationes: sed non omnia (vt aiunt) nūc
 excutienda sunt vasaria, & alioquin noua sermonum præsertim longorum exordia, temporis non
 patitur breuitas, cum & ipsa iam inclinet dies, & nonnulla fortasse alicui vestrum sunt obeunda ne-
 gotia, quorum mihi in primis est habenda ratio: quamobrem dicendi finem faciam, si istuc prius ceu
 coronidem quandam sermoni addidero meo, in animorum scilicet natura, vt ex Platonicis vidimus
 rationibus, ternarium reperiri istud quod illorum dignationem exactamque proculdubio indicat
 perfectionem. Scitis enim inter alios hunc esse perfectissimum numerum, tum quia ex imparium ge-
 nere primus reperitur, tum quia numerorum solus principium medium & finem illum præcise con-
 stituentes continent partes. In animi vero natura ternarium est, se ipsum scilicet mouens: semper mo-
 tum: immortale: ita quod vnum quodammodo & tria idem censetur esse animus: in quibus etiam
 causarum quidam esse percipitur ordo. Primum enim secudi causa, illud autem tertij non immerito
 esse perhibetur. Verbi gratia se ipsum mouēs, causa est semper moti: & motum semper, immortalita-
 tis est causa. Cum enim isthæc duo (vt retro diximus) in entium reperiantur genere, immobile scili-
 cet prorsus, quod omni motu, & omni melius est vita, ceu illud est vnum quod omnem supereminet

essentiam, & primariæ insuper unitates: & rursum id quod externo agitatur principio, quod peius & inferius omni proculdubio existit vita: id certe quod se ipsum mouet, & vicinus ipsi immobili essentia, & similius esse censetur. Semper enim quod se ipsum mouet, appetit & vult se saluum esse, quemadmodum semper est ipsum prorsus immobile, primum videlicet omnium principium: ipsum vero immortale illi appropinquare magis videtur naturæ, quæ mouetur ab alio, cum à mortis priuatione dicatur: ceu illud interni priuatione motus ab alio moueri censetur. Quāobrem immobilia omnia supra ipsum sunt immortale. immortalitas enim vita quædam est, & veluti animorum essentiæ spiritus quidam. Hæc igitur ternarij ratio in animorum (vt dictum est) spectatur essentia, qui cum inter immobile penitus, & ab alio extrinsec⁹ mobile planè existat medij: quod in unico τοῦ ἀυτοκινήτου vocabulo significanter & diuine expressit Plato: illud enim ἀυτὸν nobiliores superioresque animis indicat essentias: illud autem κινητὸν inferiores vilioresque signare videtur naturas. Per primam quidem ternarij ipsius partem immobili magis appropinquare cernuntur essentiæ: per extremam vero viciniores ei (vt diximus) fiunt naturæ, quæ solum mouetur ab alio, & externo agitatur impulsu. Hæc cum ille nō minore grauitatis iudicio, quām verborum lepore & copia recēsuisset, omniumque expectationi mirifice satissimis, cogitabundo similis finem loquendi fecit, vt ex oris illius habitu planè conjectauerint omnes plura illi hac de re quæ rite dici possent, alia occurrere, & animo obuersari. Quāobrem Antonius, qui attentissimam alioquin illi præstiterat operam, & omnem illius sermonem siccis (vt aiunt) auribus ebiberat, postquam omnia in illum admirationis suæ præconia non minus vere quām largiter effudit, Quandoquidem, inquit, eruditissime Bembe hoc Platonico disputationis conuiuio allecti potius quām satiati abs te discedimus, nihil prohibet (quæ tua est liberalitas) nos denuo, vt pro his etiā loquar, cras aut perendie ad reliqua conuiuas accipere. Hac enim re nihil gratius nobis, neque magis ex animo quicquā facere poteris. Accedemus igitur vel non vocati: & ego si nihil aliud, integrum tibi sanè huiusmodi esculentorum afferā famē. Tum ille subridēs hilare, vt semper, Tuo, inquit, iure mi Antoni omnia de me tibi polliceri libere potes. Verum memineris (vt in proverbio est) ne collecta ad conuiuum exigas. & cum dicto assurserit, idque omnes fecerunt.

Pauloque post in
de discessum
est.